



REPUBLIKA E KOSOVËS / REPUBLIKA KOSOVA

GJYKATA THEMELORE MITROVICË - DEGA E GJYKATËS VUSHTRRI

Numri i lëndës: 2025:042226

Datë: 25.03.2025

Numri i dokumentit: 07039886

P.nr.84/2025

## NË EMËR TË POPULLIT

GJYKATA THEMELORE NE MITROVICE-DEGA NE VUSHTRRI-Departamenti i përgjithshëm-Divizioni penal, gjyqtari i vetëm gjykues Naim Rekaliu, me bashkëpunëtoren profesionale Teuta Sadriu në çështjen penale kundër të pandehurit S.Rr nga fshati ..., komuna e Vushtrrisë, për shkak të veprës penale *Vjedhja e shërbimeve* nga neni 314 par.1 lidhur me nenin 77 te Kodit 06/L-074 Penal te Republikës se Kosovës, sipas aktakuzës së Prokurorit të shtetit PP.II.nr.745/24 të dt. 04.03.2025, duke vendosur lidhur me kërkesën për dhënien e urdhrit ndëshkimor pa mbajtjen e shqyrtimit gjyqësor, më datë 25.03.2025, mori këtë:

### A K T G J Y K I M

PRANOHET kërkesa e Prokurorit të shtetit PP.II.nr.745/24 të dt. 04.03.2025, andaj gjykata konform dispozitës të nenit 495 të KPPK-së, jep:

### URDHËR NDËSHKIMOR

#### I PANDEHURI

S.Rr, nga i ati S..., dhe e ëma H..., i lindur me ..., me vendbanim në fshatin ..., Komuna Vushtrri, i martuar, ka të kryer shkollën fillore, pensionist, i gjendjes së dobët ekonomike, me numër personal ..., shqiptar, shtetas i Republikës së Kosovës.

### ËSHTË FAJTORË

SEPSE: me datën 26.09.2022 dhe 07.09.2023, në fshatin ..., Komuna e Vushtrrisë, saktësisht në shtëpinë e tij, i pandehuri në vazhdimësi me dashje me anë të lidhjes direkte në rrjetin elektrik ka siguruar shërbime të rrymës për të cilat dihet se mundësohen vetëm në shkëmbin të kompensimit duke shmangur pagesën për këto shërbime, në atë mënyrë që ka këputur daljen e njehsorit dhe e ka lidhur direkt në rrjetin elektrik, me ç 'rast e ka furnizuar shtëpinë me energji elektrike pa matje, me të cilat veprime të dëmtuarës KEDS i ka shkaktuar dëm material në shumën totale prej 86.77 Euro.

-Me këtë ka kryer veprën penale: Vjedhje e shërbimeve nga neni 314 par.1 lidhur me nenin 77 të KPRK-së.

Andaj gjykata—konform dispozitave të neneve 4, 7, 17, 38, 39, 40, 43, 69, 70 dhe nenit 314 par.1 lidhur me nenin 77 të KPRK-ës, si dhe bazuar ne nenet 450, 493, 495 të KPPK-së e gjykon me:

#### DËNIM ME GJOBË

Me të cilën të pandehurit S.Rr i caktohet dënimi me gjobë në shumën prej 200€ (dyqind euro), i cili dënim do të ekzekutohet në afat prej 15 ditëve nga dita e plotfuqishmërisë së aktgjykimit.

Në rast se i akuzuari refuzon të paguajë këtë dënim me gjobë, atëherë ky dënim me gjobë do të shndërrohet në dënim me burg, duke i caktuar të akuzuarit për çdo 20€ (njëzet euro) të dënimit me gjobë, nga 1(një) ditë burgim.

Pala e dëmtuar për realizimin e kërkesës pasurore juridike udhëzohet në kontest civil.

DETYROHET i pandehuri që në emër të paushallit gjyqësor të paguaj shumën prej 20(njëzet) euro, si dhe në emër të taksës për kompensimin e viktimave të krimit të paguaj shumën prej 20 (njëzetë) euro. Të gjitha këto në afat prej 15 ditësh prej ditës së marrjes së formës së prerë të këtij aktgjykimi nën kërcënimin e ekzekutimit të dhunshëm.

#### A r s y e t i m

Prokuroria Themelore në Mitrovicë ka paraqitur aktakuzën PP.II.nr.745/24 të dt. 04.03.2025, kundër të pandehurit S.Rr nga fshati ..., komuna e Vushtrrisë, për shkak të veprës penale *Vjedhje e shërbimeve* nga neni 314 par.1 në lidhje me nenin 7 të KPRK-së.

Gjykatës i është kërkuar që kundër të pandehurit të jep Urdhrin Ndëshkimor me arsyetimin e besueshëm nga kallzimi penal dhe provat e bashkangjitura lidhur me bazueshmërinë e aktakuzës së prokurorisë së shtetit në drejtim të vërtetimit të fakteve se i pandehuri vërtetë e ka kryer veprën penale për të cilën akuzohet.

Me dispozitat ligjore të Kodit Penal të Republikës së Kosovës, për veprën penale *Vjedhje e shërbimeve* nga neni 314 par.1 të KPRK-së, me të cilën akuzohet i pandehuri, ligjvënësi ka parashikuar dënimin me gjobë ose burgim deri në tre (3) vite, që nënkupton se në rastin konkret zbatohen dispozitat ligjore të procedurës së veçantë nga neni 493 dhe 495 të Kodit të Procedurës Penale të Republikës së Kosovës. Me rastin e shqyrtimit paraprak të çështjes e konform nenit 493 të KPPK-së, gjyqtari i vetëm gjykues gjeti se janë plotësuar kushtet nga neni 493 të KPPK-së dhe konform dispozitave nga neni 495 par.1 të KPPK-së ashtu që mori vendim që ta pranoj kërkesën për dhënien e urdhërit ndëshkimor si në dispozitiv të këtij aktgjykimi.

Gjykata konsideron se provat e bashkangjitura në shkresat e lëndës si: Procesverbali me numër 2070632 i datës 07.09.2023, Fatura me numër DMIHP2320606 e datës 11.09.2023, Kalkulimi i rikthimit të humbjeve me ID të rastit 489243 i datës 11.09.2023, shtatë (7) fotografi, Procesverbali me numër 2068745 i datës 26.09.2022, Fatura me numër DMIHP2219288 e datës 14.11.20255, Kalkulimi i rikthimit të humbjeve ID të rastit 444122 i datës 14.10.2022, tri (3) fotografi, Procesverbali për intervistimin e të pandehurit S.Rr në Stacionin Policor Vushtrri i datës 13.02.2025.

Me rastin e caktimit të llojit dhe lartësisë së dënimit gjykata morri parasysh rrethanat si: shkallën e përgjegjësisë penale, si dhe rrethanat në të cilat është kryer vepra penale, pasi që i pandehuri e kishte kryer veprën në vazhdimësi me dashje me anë të lidhjes direkte në rrjetin elektrik, kështu duke furnizuar shtëpinë me energji elektrike pa matje dhe duke ju shmangur pagesës.

Gjykata çmon se dënimi me gjobë i shqiptuar është i drejtë dhe i ligjshëm, dhe se është në harmoni me shkallën e përgjegjësisë penale së të pandehurit dhe me intesitetin e rrezikimit apo dëmtimit të vlerës së mbrojtur. Së këndejmi me praninë e të gjitha këtyre rrethanave nuk ka pasur vend që të pandehurit t'i shqiptohet një dënim më i butë ose me i rëndë.

Andaj, gjykata vlerësoi se edhe me këtë dënim të shqiptuar do të arrihet qëllimi i dënimit në vështirim me nenin 38 të KPRK-së, që të parandaloj kryerësin nga kryerja e veprave penale në të ardhmen, të

bëjë rehabilitimin e tij, që në të ardhmen i pandehuri të ketë të kujdes të shtuar që të mos bie në kundërshtim me ligjin, pasi që gjykata mundet të ashpërsoi dënimin kundër tij, si dhe me këtë dënim shpreh gjykimin shoqëror për veprën penale të kryer dhe ngrit moralin dhe forcimin e detyrimit për respektimin e ligjit.

Vendimi mbi shpenzimet e procedurës penale për paushall gjykata e mori në kuptim të nenit 450 par.2 nën paragrafi 2.6 lidhur me par. 1 të KPPK-së, ndërsa vendimin mbi kërkesën pasurore juridike gjykata e mori në bazë të nenit 463 par.2 të KPP-së. Ndërsa vendimin për taksën e kompensimit të viktimave të krimit gjykata e morri në bazë të nenit 39 par.3 pika 3.1 të Ligjit nr. 05/L-36 për Kompensimin e Viktimave të Krimit.

Me sa u tha më lartë në kuptim të nenit 365 të KPPK-së u vendos si në dispozitiv të këtij aktgjykimi.

## GJYKATA THEMELORE NE MITROVICE-DEGA NE VUSHTRRI

Departamenti i përgjithshëm-Divizioni penal

P.nr.84/2025, të datës 25.03.2025

Bashkëpunëtorja Profesionale  
Teuta Sadriu

Gjyqtari i vetëm gjykues  
Naim Rekalio

**KËSHILLA JURIDIKE:** Kundër këtij aktgjykimi mund të ushtrohet kundërshtimi në afat prej 8 ditëve nga dita e marrjes me shkrim. Kundërshtimi i drejtohet kësaj gjykate me shkrim apo me gojë në procesverbal të gjykatës.

Numri i lëndës: 2025:042226  
Datë: 25.03.2025  
Numri i dokumentit: 07039886